

四庫全書

集部

# 欽定四庫全書

集部

陵陽集卷四

詳校官庶吉士 臣 張 溥

主事 臣 呂雲棟覆勘

總校官編修 臣 王 燕 緒

校對官編修 臣 蕭 九 成

謄錄監生 臣 趙 錫 蒲

欽定四庫全書

集部四

陵陽集

別集類三

宋

提要

臣等謹案陵陽集二十四卷宋牟巖撰巖  
字獻之湖州人父子才理宗朝官端明殿  
學士禮部尚書以剛直著名巖亦登進士第  
官至大理少卿入元不仕閉戶三十六年故  
其集中九日五言詩序論陶潛於王宏中路

具酒食事及題淵明圖諸文意皆自寓又嘗  
謂世喜稱淵明入宋書甲子無年號黃豫章  
亦曰甲子不數義熙前然今陶集詩本無書  
年號者淵明恥事劉裕大節較然此未須深  
論云云故獻文中多書至元年號意本此也  
是集凡詩六卷襍文十八卷前有至順二年  
程端學序王士禎居易錄稱其詩有坡谷門  
風襍文皆典實詳雅今觀所作知士禎之論

不誣獻本蜀之井研人世居陵山之陽至子  
才始著籍湖州其以陵陽名集者蓋不忘本  
也乾隆四十六年十月恭校上

總纂官

臣紀昀

臣陸錫熊

臣孫士毅

總校官

臣

陸費

墀



陵陽集原序

文者言語之精華也因吾道以有傳然古者文以道傳  
後世道以飾文古之人有是道然後托於文以達之道  
若斯文亦若斯故其言約以實是謂文以傳道易詩  
書春秋論孟是也後世不必皆以其道亦欲為文以自  
見道若斯文不若斯故其言支以虛是謂道以飾文文  
士之文是也然則終不復古乎復古有道道弭乎中不  
得已而有言文斯復古矣故周程張朱數君子者出而

太極圖說西銘易傳語類諸書不在中庸孟子下誰謂  
文不可復古乎亦在實之而已矣西漢之文道雖不醇  
大畧言由事發猶近古也自餘隨其人品以為重輕若  
諸葛孔明陶元亮杜子美陸敬輿韓退之歐陽永叔蘇  
子瞻曾子固數子者其忠義直諒磊磊落落有以自顯  
於世而其文亦可相為不朽至如司馬相如揚雄柳宗  
元王安石之流其聲音步驟蓋亦無媿乎數子然予不  
知讀其言者視其人何如也由是觀之傳道之文與天



地悠久其次與其重輕下此猶榮華飄風而殫一世之  
力而為之者惑也故元初陵陽先生牟公巖博學實德  
為時名卿天下之書無所不讀古今典禮無所不考其  
源出於伊洛其出處有元亮大節故其發於文章淵源  
雅淡從容造理其法度之妙盖有與歐曾並馳而其實  
則吾道之言也天下後世當有慕其人而愛其文誦其  
文而想見其人者矣端學自史院歸田於鄞公之次子  
浙東帥府都事應復景陽甫在鄞出公詩文若干卷將

鋟諸梓屬端學序引自惟庸陋生晚於公無能為役其  
敬贊一辭然亦嘗登公之堂而識公之容亦嘗誦公之  
文於學者所傳且得交於景陽悉觀公之著述非幸歟  
敬附一言以志予之幸若公之德業文章則不待贊也  
至順二年八月朔從仕郎前翰林國史院編修官程端  
學序

欽定四庫全書

陵陽集卷一

古詩五言

東野平陵圖

元 牟巖 撰

鞅掌不可耐壯士縛申卯驅驢古平林水木樂幽茂苦  
吟到斜日危坐類持釣俗情見擺落鵝鴈極衆口兩曹  
第忍之適滿百乃報吾終不以此而易彼升斗小裁鶴

料案官事竟未了斯人坐詩窮咎在虧天巧有如發其  
幕為謔豈不暴理宜得嫌憎枵腹鎮雷吼區區尤李氏  
此頗天意不

趙春谷約游北山次陳本齋韻

病士痼於懶舉世少匹亞未省讀道書低頭蒙絳帕夢  
想北山北戶限久不跨折簡許我游籃輿暫相借腹鳴  
肩自舉悠然謝銜靴邂逅得水竹神明湛吾舍山亦紫  
翠橫了不費要迓平生赤兩脚城市所深怕何妨巖石

間共永一日暇高情偉卓聲不在古人下喜客見眉宇  
煇若掃風榭老山澹一壑龜息聞靜夜攝衣倒凌景回  
首憐俗駕吾儕偶會弁小語輒雷咤風雨萬慮清詎肯  
隨物化商山尚局促而況彼畦夏

東坡九日尊俎蕭然有懷宜興高安諸子姪和  
淵明貧士七首余今歲重九有酒無餽而長兒  
在宜興諸兒蘇杭溧陽因輒繼和

吾翁始落南土思尚依依築堂扁岷峨目斷落日暉憶

卷一  
昔丙申歲錦里烟塵飛甲子已一週而我猶未歸孤蓬  
失本叢旅鴈抱長饑百年直寄爾曠然勿徒悲

驚飈舉落葉意氣何軒軒秋高百卉盡寂寞但空園何  
異富與貴變滅隨雲烟緬懷陶彭澤平生極幾研朗詠  
貧士詩相對如晤言今人之所耻古人以為賢

我殆勝彭澤無酒亦無琴湖外來遠餉屋角嘒好音吹  
帽節已迫醉鄉路可尋勿違故人意洗盞起自斟甜酒  
乏風骨谷永與杜欽而此清且勁良足慰我心

人生徒自苦與世為卷婁何如有美酒自獻還自酬貧  
雖不若富用寡庶易周婚嫁願已畢此外復何憂况無  
下溪田得與彭澤儔年豐米長賤一飽或可求

翁媪老白髮蕭然老江干大兒荆溪遊折腰豈為官諸  
兒走異縣亦各營一餐別多會面少端復坐饑寒諸幼  
且眼前笑語開我顏勿問賢與愚懷抱俱相關

好惡豈不察鑿垣植蒿蓬而此庭前菊鋤灌少人工此  
物抱至潔有似楚兩龔留香待嚴凜意與烈士同龔土

笑伯始金錢鄮鄧通千載一元亮舍此將安從

兩山南北峙四水貫此州登臨豈不嘉出門自寡儔客  
鄉幾重九歲月如奔流蕭然具果飲聊以散百憂平生  
和陶集韻高乃敢酬乃復咏歌之歲晚葆姱修

和程漁莊救燕

燕巢屹高壘蛇行危折磬不虞猝見侵怪事發軒屏黃  
口養漸大紫翩翩相映雌雄力難護吞噬氣方盛豈不  
避戊巳天意特未定主人勇赴救為惠固當竟蜿蜒墮



尺筭折首甘所迎古人致陰類嗜好用其性此族遭炮  
燔往往多天橫人固異於物縱暴胡忍聽試看自古來  
善者終必勝羿殞莽亦屠曾莫保軀命報應各以類豈  
不信可証驅而放之道是乃三代政姑用柳子言鋤吾  
草萊徑

題淵明圖并序

淵明九日無酒坐宅邊菊叢中意殊寂寞江州刺史  
王弘諸孫已荷朝寄猶知有賦歸去來者能於此

時遣白衣擔酒遠餉邂逅一醉大是奇事集中九日  
詩僅兩首無酒則曰塵爵耻虛罍寒花徒自榮有酒  
則曰何以稱此情濁酒且自陶而王茂弘所餉已酉  
九日十有九年畧不見詩集何耶此翁志節耿亮與  
秋俱高往往逃於酒而寓於菊二詩之作一感一喜  
微見於意固不暇於歲歲皆詩此中有真意欲辨已  
忘言正當求之言句之外可也此幅筆雖簡意有餘  
輒和已酉九日韻述其事醉中看畫未免發千古一

笑

平生抱耿介四海寡朋交  
淒其九日至頗感顏髮凋  
無酒醒對菊風味乃更高  
誰識此時情白雲行遠霄  
地主有佳餉得之良已勞  
而我適邂逅赴飲如沃焦  
永言大化內朽質非所陶  
惟有飲美酒一醉可千朝

九日并序

陶公再為建威參軍劉裕幕府也忽棄去屈為彭澤令未幾又棄去裕是時已有異志劉穆之寧死不與

九錫事王弘自江北來首以此事風朝廷裕遂移晉  
祚而弘為吏部尚書為江州刺史遂被心腹之寄既  
來江州柴桑近在境內於陶公時惓惓豈非內懷前  
媿欲拔高人勝士以自湔祓耶彼曷不知名節之為  
高也陶公未易致則使人中路具酒食候其出醉而  
要之庶幾一見斯蓋已甚迫則亦可以見吾胸懷本  
趣固有在豈端為一王弘哉適乘籃輿足以自返其  
視華軒為何物而弘欲以此榮其歸此又可笑也前

是論者偶未及九日蕭然因賦數語

秋風颭以至今日重陽日明明對南山尚想陶彭澤向  
來建威幕頗見有此客驅車不少留駕言公田秫如何  
又棄去此意誰能識寄奴趣殊禮風旨來自北只今王  
江州建白功第一故是僧彌孫舉動殊足惜飲媿望柴  
桑稍欲自湔滌殷勤白衣餉猶恐不我即中路候籃輿  
要致已甚迫葛巾赤兩脚頽然向州宅此翁本坦蕩焉  
能苦違物一時可計取中實未易屈華軒有何羨自載

返蓬華終身書甲子凜凜義形色如使磷且緇安得為  
玉雪籬邊有佳菊弄黃正堪摘我方持空觴千載高風激

簡趙子昂

君維大雅姿被服藹蘭蓀胃次綜流畧本本又元元手  
追七子作凌厲氣所吞餘事到翰墨藉甚聲價喧居然  
難自藏珠玉走中原四年郎省户小滯當高騫肯來為  
多士復除布春溫力爭吾道回中流收崩奔眷言維桑  
舊從容駐輜軒我亦喜再見一笑畧寒暄首誦新詩章

兩耳為君尊高情殊磊落俗子何足論顧我寂寞地無  
物當贈言乃復攜尺紙看君醉墨翻霜木石共老野竹  
翠不蕃落筆頻申頃歲晚古色存思君時一把此意期  
勿諼

和趙子俊間居十首

俛仰一室內我興尚無為凝塵澹素几乍見間居詩吐  
詞甚高簡觀者未必知士固各有志肯為富貴移汲多  
羸其瓶居然井在湄何似鷗夷全張弛隨所宜楊子不

違物趙子不干時此意諒所同相與三復之

窘步殊蹢躅戶限久不踰若或繫維之媿彼空谷駒俛  
焉念平生我亦酷信書所得不償失每與憂患俱飲水  
飯脫粟此意豈願餘貧實為我累舍貧將焉如堪嗟嗜  
利者死甘諡為愚

維昔陶元亮早歲尚隱淪從事建威幕奔走戎馬塵宵  
征亦良苦我豈戀軒茵時運不可回物態日以新悠然  
彭澤去漸與鄉里親公田半稅秫亦足慰我貧有人企



高躅漫仕求所伸閭嶠雖云遠絃歌遂其真

九日忽已過霜薄陽光晞未漉頭上巾先典篋中衣時  
物尚有菊採掇頻爾稀對酒胡不飲坐看白日飛五勝  
更囚旺萬事誰是非且復進一觴酒盡情依依晚蝶抱  
孤藥無乃昧先幾

勢利苦炎炎名節貴皜皜河縣開桃李家園熟梨棗當  
年歸騎省名譽豈不早一染金谷塵蕭艾沒芳草胡為  
閒居賦乃謂任安巧所以惟慕陶固窮而守道

我亦愛閒居好山環屋青拄頰坐來久冉冉白雲生山  
中有三秀誰為采其榮散我腰脚頑使我神觀清

我居殊偏仄東西鑿兩牖卧起於其間不知歲年久秋  
菜上墻生廢圃一何有只應谿上人笑我已白首橘柚  
非所種勸我且種柳也莫種牡丹與物爭妍醜

閒居維弄翰窻明庭戶寂硬黃力追古旁觀共歎息當  
由結習深疊疊向晨夕持用自怡悅而不為物役但恐  
好事者逸少混鐵石我能別真贋一紙百金直

衣短不及髡髮短不滿梳惟有憂世心皇皇此生俱耐  
魚呼轍中微濕以相濡斗水旦夕急豈與人意殊試誦  
反招隱願無懷故居墨突何曾黔行矣勿踟躕

人生與出處要不失其正手捧毛義檄以為庭闈慶祿  
養有甘旨東西惟所命賀客來何多踏破蒼苔徑再拜  
稱壽觴閭里生新敬

米元暉山水

鵲突烟樹外水遠山更長天地有如許扁舟何處藏如

何短蓬底結習猶未忘是時水月繁不見此夜光於今  
尚無恙懷袖行可將我亦流落者此味慣所嘗誰能畫  
我堂坐我於其旁

十月既望能靜飲客海棠花下即席索詩走筆  
一笑

久聞使君歸扁舟欲自載竟負九日約吾意良有待今  
朝得得來適與佳辰會名園盛衆卉搖落不少愛為語  
玉林神無乃風景殺春葩發霜枝一夜作奇怪此花紅

濕處無如錦城最衝來定鴻鵠萬里從雪外高情相暖  
熱置酒出花背固知是鄉人豈不在我輩西莊見西產  
一笑心領解主人獨妙年有花正宜戴胡為亦見分無  
乃嘲老大誰令開非時故遣白髮對君勿輕白髮髮白  
老更耐洛陽劉伯壽耆英典型在醉帽仍插花豈是兒  
女態還以壽主人風流更耆父

羅漢臣挂笏亭

爽氣鍾於西峨眉橫太白春風吹不暖暑路有積雪月

照平羌冷雲頂七頂濕游戲兩謫仙銀河酒醉墨遂令  
漢嘉郡千古占一色一從殊方走江山頗蕭瑟流落各  
天涯相逢未相識微聞莊舄吟握手話疇昔乃知此邦  
秀終不斷地脈權門車如霧衆甘炙手熱而君獨幾先  
惟恐浣我笏偉哉百尺樓西望即鄉國爽氣今已回何  
妨高挂頰里中表聖公千載推汲直當年幾諫紙扣笏  
良鯁切意欲摧百士死職非所惜此笏豈其遺正自峭  
風骨願君善藏之擊邪看他日也無羨堆牀富貴竟何

益長鏡白木柄乃我手中物惟有故鄉夢與君共愁絕  
何當駕雙鵠萬里遡寥碧

文本心參政約游西山分韻得頂字

僕僕事行役度盡千峰頂恣覽亦云倦困卧殊未醒西  
爽俄見要前約欲重訂結習若猶在寧復計兩脛天際豁  
輕陰溪頭橫短艇捩手謝籃輿信步蹋荒徑適意自忘  
遠迷途誰為詞此翁平生意故自畧畦町何妨一笑回  
呼僮催煮茗兩年已三至我如飲黿鼎無乃太屬厭徒

欲逃酩酊老筆忽先倡高標誰與並尚記去載游金碧  
光炯炯何處非吾鄉一氣相滓溼

送姚子敬

方間興秀孝久矣無令舉公車冷於冰吾已棄如土提  
書向孔墻萬代禮樂主而與先簿正厥有聖法寓士也  
得所歸至窮亦云遇於惟京類舊幸不生蒿穰斯文諒  
在茲天意豈輕付之子抱淵靜蕭然守環堵光彩難自  
闕珠玉滿囊楮一從鶚表飛諸公共稱許如何但熟睨



引鼎力不武棲遲冷椽間無乃太廉取相縻共升斗端  
欲重鬻字勿嫌屋打頭碑兀氣未吐六月取一息千里  
始跬步期君在遠業看君即軒翥風雨忽道別恨恨寡  
悰緒從今閉柴荆何以慰衰暮

題張老山從好堂

世有嗜土炭恣啖等梁稻海上逐臭夫自謂姣且好好  
惡一失正萬境眩顛倒亦有欲富者蠅營無不到洗削  
誇鼎食執鞭甘隸皂於此還有人深耻貨賂冒一笑視

千駟貧賤守以道厥好豈爾殊吾自有至寶但恐好不  
真回奪諒難保老山殊絕塵褰裳衣欲縞區區名與利  
何曾挂懷抱世人定不愛昌歆與羊棗吾意各有在  
端未恨枯槁從好以名堂一室聊笑傲心惟有所好乃  
能無所好好仁者夫子不知歲年老益晚而好易易編  
窮所好彼富如浮雲非義是所悼諒茲得其從聖言極  
探討孰重複孰輕辨之亦既早而我方忍饑四壁淨如  
埽舍魚取熊掌因用儆衰耄

十日菊為子昂壽

風露浩如洗漸覺霜氣滋九日已成旬黃花爛盈枝誰  
云清香減清香在詩脾詩人亦未老皎皎冰雪姿為我  
掇繁英和露三嚙之此物是壽耐千載以為期一點綴  
鬚髮真是麒麟兒長大著膝上綵衣相娛嬉

戚子雲袖詩見過且篤叙先祭酒與先人同朝  
之雅意甚古用韻為謝

白髮祭酒公儀刑古君子多士所共敬豈獨桑與梓吾

翁幸同朝輦路時並轡流風日以邈追慨徒倚徙子雲  
篤世誼竭來自攜李念我一破廬落落荒城址遺以五  
朶雲置之五雲裏我是老祠官未忘鏡湖水握手更細  
論書味淵以旨嘉問有青衿十載詩千紙

西品使君上冢過雲首訪敝廬又會能靜話舊  
感慨情見於辭所以道別

自為盱江行最聲日飛馳赤子問襦袴白雲滿鬢髭  
苦邊重會晤握手慰所思舊有瀧岡表三讀起懦衰迺翁

平生志正在造膝時曾擊戚畹悍曾疏公田欺曾陳峴  
山急或訝話太危移疾逃相印何忍張悌為全歸干戈  
際一致視險夷象賢有令子紀實無溢辭刻之並纂疏  
自足永久垂憶昔姑孰守欲碎脫鞬碑博士何偉哉奮  
身力護持麤沙與大石彼計竟莫施遂令兩圖在留作  
千載奇此事關世道礪激我匪私他時記先友要當附  
見之顧我窮未死僅存骨裹皮殷勤綈衣貺古道其在  
斯無物當贈策遠大以為期願勿忘吾州歲晚託茅茨

和德清曹魯郊七十一吟

元日書甲子曉槃問五辛頗記絳縣老宜有善頌陳君  
平生是歲早晚戰伐塵明年七十二舊謀無糾紛斜飛  
滯棲枳旁觀嘆積薪歎乃來澤國比屋多嘖呻何由躋  
壽域君勿開荒榛遺以大有年在在鼓腹人非徒事勾  
稽耄稚情日親溪流甚清泚鷺山亦嶙峋胡為動鄉思  
便欲乞其身駕言登東山遐眺窮厓垠有時於沂浴庶  
幾遠俗氛平生布衣舊方今鼎鉉臣挽留不聽去好語

溫如春悠然復少住終惠此邑民九十以珍重八十起  
渭濱如君老益壯眼明無眵昏精力殊未衰齒宿意自  
新盍陪英俊游可是枯槁倫而況二三子左右參魚鱗  
從翁取青紫且姑置垂綸憶昨初相識氣象清以淳而  
我已索如髮短不可耘蓬廬辱再訪頓覺雙眉伸大笑  
向我言六甲那解輪惟須飲美酒分餉良已勤珍重君  
子意自酌不及賓和氣何盎盎喜色何津津長我梨與  
棗平地即仙宸勿使他饋傷小大相參辰悛誦長短歌

尤足夷我神倘來視富貴高情渺浮雲想其下筆時健  
能幹千鈞君倡我當和撚髭簷屢巡向來九老集往往  
多沉淪亦欲相從去病憊力弗臻似聞紀初度先我十  
二旬看君詠薰風笑我醉霜旻所期在千載天地見本

真

蓋其生五月  
予九月也

餞潛岡南提舉

君前郡文學端自吾州始壇坫日以高到處執牛耳平  
生灑落胸作事故奇偉飛上南樓去坐得數千里全楚



帶五嶺古俗甚豐美一昨干戈後或未識瑚簋禾穰生  
蠻宮學士氣如洗此行累佩印良為吾黨喜三閭屈大  
夫四海洗鑿齒堂堂始興公亦從韶石起何地不生賢  
幸勿遐陋視著意絢荒餘文物中州比况復多蜀客誰  
其顧瑣尾相與噢休之我頗念桑梓垂老猶惜別何以  
當馬箠願君為廣廈大庇天下士

栢生兩石間千歲終不大韓子則欲移之平地  
以遂其生栢生兩石間天命本如此蘇子則欲

安之石間以全其生二說若異然韓子愛惜人  
物以有用者也故又曰傷根栢不死千丈不難  
至蘇子愛惜名節以自保者也故曰雖云生之  
艱與石相終始愛栢一也雖然處險難而出險  
尤難金華倪君老儒也以栢山自號因取二公  
意賦詩寄之

栢生兩石間平地盡移置平地豈不好又恐傷生意兩  
翁為栢謀其慮各已至受命獨也正固與凡木異夷險

猶爾殊而我本一致但能全其天所擇不在地我聞栢  
山名抱藝久不試自種秋栢實離離滿山翠石礙曾不  
傷地平亦不肆歲月漸婉婉冰雪幾凌厲此栢初不知  
老大見根柢一笑謝兩翁何省為榮悴

送洪竹堂

家住西湖西愛吟仍愛竹富貴豈不好變滅如轉燭一  
昨流落後破垣竹猶綠往事何用訪得此良自足胡為  
被書誤彈冠向苔曲三年飯脫粟不飽而况肉頗有青

衿子對之尋舊讀時復吐佳句家山如在目不知竹是  
伴誰護蒼玉束官滿還滯留欲歸未可卜無錢買扁舟  
遷居更勿促悠然謝此君行止任遲速新年雨雪深忽  
已歸期告天公似有意為爾開晴旭士固不可料窮久  
理當復東風吹浩蕩萬里奔鴻鵠

贈姜醫

越人嘗遊齊後世多名醫漢時太倉長亦復出臨淄子  
實同鄉里兩翁諒所師從今雪川水飲者不厲疵

贈日者薛東湖

抱疴蓬廬下白日背我馳我生已如此天命復奚疑  
悠哉東湖水不迎亦不隨相對澹無語可以樂我饑

陵陽集卷一

欽定四庫全書

陵陽集卷二

元 牟獻 撰

古詩五言

和德問弟苦雨

鵲鳩朝喚晴竹鷄莫催雨  
脩脩晴雨間平生睡足處  
剥啄忽以詩使我浪愁苦  
此事屬天公底用強如許  
淋漓不得休土偶復於土  
君何見之晚三嘆詠集  
栩不如兩

忘言危坐擁敗絮向來夏畦勞抱甕漢陰圃旱澇相乘  
除天地只此數為我語老農未用輕喜怒使有二頃田  
亦欲荷鋤去我評昔遜世幼安勝根矩毋為苦近名江  
湖多數畧但看采榮者隱約殆終古彼以膏自煎謝去  
非吾侶無已則沮溺躬耕諒所取吾儕固長貧正坐力  
不武所營薄少耳搏沙尚難聚却笑杜陵翁欲把漏天  
補胡不歸自謀颼颼破茅宇天邊金老鷄已放晴曜吐  
馬嘶羣動起吾惟守環堵



和無逸子敬獨姥山

維址呀洞戶雲氣一縷烟老龍蓄精祐萬石護其巔從  
此叩林屋倒翻水中天金庭漫隔九窮探未擬旋轟厖  
四面動兀坐孤寂然頗疑北山脈跨湖潛屬聯歸來夢  
所歷跳波撼晝眠種橘化為枳我髮日已宣何時菴邊  
路去伴毛公仙獨姥舊聞名俚俗訛已傳一朝得妙語  
塗抹乃更妍天姥似失色葉姥休語年而我復自笑搞  
乾非葉鮮聊以調二士鼓棹還延緣

和善之遊龜溪乾元寺

疇昔侍吾翁尚記入雲年  
米麴家家釀蒲荷處處田  
龜溪見鶴林欲去遭挽牽  
借屋度長夏對牀時醉眠  
或登左顧亭風物清且妍  
回顧一甲子往事隨奔川  
翰林左綿秀宮錦不上舩  
肯尋兩翁遊來弄明月泉  
弄泉珠麗袖吟詩箭脫弦  
是誰修月斧斲地成空穿  
猶有半泓碧柰此筆如椽  
乃知宇宙內小大常相懸  
惟堪供我輩古瓦生茶烟  
雲乳聊一啜松風灑禿顛

和善之遊法華

勝游得勝士欲濟得健艣如此正自佳寧論晴復雨徐  
行看前山雲氣互吞吐借我烏藤枝急奔青蓮宇跋囊  
良亦疲遽篠可能俯呼酒酌此脚一笑失枝挂吾懷已  
曠然阿香殷餘怒牀敷相對睡不暇叅佛祖晨光報新  
霽生色浮宿莽諸峰忽自獻頗自作眉嫵絕頂瞰具區  
勇往不可戶而我跛躄者遲鈍誰比數窘步竟難陪內  
熱生心腑龐通遠相要淵明喜欲舞籃輿叩隱廬趺坐

金剛經卷第二  
卷二  
直香縷四士苦未還踏破辛夷塢俱是青雲客那得薄  
圭組新笋甜如蜜新茗白勝乳山靈倘見容吾欲老茲  
土預愁下山去塵事紛旁午試問白木鐺何如長柄塵  
他日蒙萊把終當作地主此翁無乃癡紉如已五鼓

真隱詩

招隱費招呼習隱聊習步素隱為素餐充隱似充數悠  
悠千載內罕與真隱遇少小慕真隱每誦坡老句竭來  
法華遊正在題詩處真境忽在前更慕坡所慕真則思

慮泯不真精爽驚真則光塵合不真圭角露真書無敵  
仄真味無反惡真樂無安排真逸無疲苦所以要任真  
從其訝箕踞所以貴葆真從他笑推魯但看真隱廬蕭  
然只環堵青山以為屏白雲常在戶隨宜種花藥快意  
掃庭宇可作真率會可說真實語可飲真一酒何者非  
天趣玄真乃詩流季真是仙侶拉之相與俱巾屨此容  
與坐聞雛鶴鳴時看蒼虬舞疎散畧邊幅誰客復誰主  
吾亦忘吾真酣歌下山去

俞好客又號菊莊為賦數語

人生自作計北屋連南莊其間復何有積粟埋屋梁敢  
村有退士用意獨異常種菊一萬株規作歲晚糧老農  
與老圃工勤畧相當春雨茁陳根柔莢綠於秧剪翳披  
厥穎葉盛在本昌啜之付茗碗聊誑蓰莧腸秋高飽風  
露粲粲枝間黃使天而雨金不可以為糧此賜何敢慢  
再拜然後嘗接笋不勞咀迸入牙頰香三嚙下丹田字  
之曰黃梁其情性具烈毋以他饋傷為爾制頽齡使爾

壽而康彭澤有公田秫種半頃強正使及秋成所得亦  
已涼奈何不少忍決去驚鴻翔百匝繞東籬采采不盈  
筐高吟發清餓持此送一觴珠玉實其腹千載有耿光  
子亦慕陶者閉戶歌慨慷但得三徑存何慮一莊荒老  
我饑不死誰與辟穀方作詩聊以贈一笑為發棠

鄉曲諸名宿不鄙老朽移樽見過風誼甚古  
語笑甚歡輒借昌黎人日城南詩韻少見謝  
意

人生貴合併造物忌嘲弄頗與同社闊正坐兩肱凍南  
城七日遊前事諸賢用但愁茅屋陋不足置賓從此會  
豈偶然歲月日時共皆壬寅四癸義可取三壬老堪送况  
有蹇東陽初不減潘翁渴吻久已燥樂飲宜一縱笑談  
更溫克容與非倥偬永言戢厚意拜嘉敢不重

李千秋訪數語代謝

昔有孟萬年脫帽狂不休今有李千秋吟詩醉愈道我  
久聞佳句一面苦未酬殷勤忽過我意氣殊相投能道



太白語便可太白浮清論或抵掌烏紗猶在頭而我已  
頽然頗有此樂不偉抱自卓犖下國難淹留同來玉雪  
郎外家乃名流好歌鳳將雛飛上丹極遊

宣和御畫紫芥

荒園老蔓菁空見根葉大苦硬螫人口棄去何足賴穰  
穰來萬蟻微醒有餘嘖

岳君舉用東陽法釀酒味頗蘊藉長兒攜歸偶  
得數語

昔屢飲東陽往往錯認水次公似少猛汲生終戇耳知  
我野心性雅不便軟美契闊二十年那復此風味飲酒  
真飲蜜直欲嘔心胃兒從南塘歸殷勤有佳遺公等久  
要在相看猶故意曲江加蘊藉鄭公殊嫵媚一見極傾  
倒吻渴不能止正性固自存遽莫測其際徐覺和以諍  
雖勁還可喜酒固未易知知酒亦非易酩酊何適從不  
夷而不惠

德清孫氏和樂秀明堂

人生致足樂莫如令兄弟綽綽而有裕其中自春意龜  
溪有二孫能篤友于義同居五十載闔門數百指幾微  
無間言輪囷有和氣粵從鴻雁散惟恐棠棣廢欲挽古  
道回茲事良非易亦既成新居始得遂初志和樂揭高  
扁秀明屹對峙怡然兩白髮塤麓伯仲氏子孫皆雍睦  
閭里亦順悌復如無事時難得真可貴唐史傳孝義頗  
記張劉李跡其屢易世往往干戈際義風不少衰大書  
乃無媿嗟哉廣明后旌命曾弗至雖有篤行者誰為紀

姓字我聞二孫名不覺為之喜兩記信實錄聯名盡名  
士先見衆論公必得一行史行看表門問鄉邦誇盛事  
我詩甚鄙拙願爾多壽祉

贈俞山月

童奴從長耳萬風聲蕭騷歸從半山路問字良亦勞臥  
聞饑虎嘯喚醒平生豪前山忽湧月始覺所見高頎然  
有遠孫載酒江湖教胸中湛水鏡邂逅得所遭古月還  
相照了不隔秋毫但憐露草濕時復暮蟲號

送唐同知

平生一寸心神遊夢華錄喜君晚相遇風景宛在目肯  
為此邦來大是渠儂福我但飲若水生意已俱復軋軋  
寒女手何事嗟空軸欲去復停車為爾兩眉蹙猶是前  
叔度五袴回餘燠千家萬家喜吾意始云足路穩驅車  
去祖帳紛相屬賀下不賀上此語傳古俗况攜善頌歸  
親舍喜可掬烹羔傾家釀懽聲動隣曲麾節願早還春

風棠樹綠

適安齋

天圓如旋磨萬古幾曾息日轂環之走西墜俄東出聖  
賢法天運所以長汲汲大禹生胼胝孔弗遑煖席客寢  
何太康人或規不及亦有功名者齋內運甓百不放身  
暫閒苦欲勞筋骨如何適安齋燕處甘暇佚此齋匪侈  
麗易安取容膝竹几對藜牀左右置書冊有時值佳友  
從容遂竟日體適任屈伸意適任語默惟其適之安適  
且忘吾適向來孤山老保此踰耄耄以安遺子孫此計

固已得人生天地間何事非吾職夜思晝所為然後安  
可即况君抱修能當念踵前業相期在萬里無從守一  
室精義以致用龍蛇豈其蟄

次韻程晉輔

一宿蘧廬托百事弁髦棄平生意何如猶動沾沾喜我  
喜在丘壑富貴非所睨况子好山居泉甘野芳媚鹿門  
時上冢了不慕城市或嫌人村遠知一未知二試看近  
市者事奪紛夢寐正墮膠網中輾轉悞身世舉手謝逋客士

固各有志結習奈已深坐上漫同異山空陰綠淨長日  
惟宜睡夜半呼僮奴發火燃枯蒂滿紙詩已成文采一  
何麗墨池漲玄雲晴窓藹微霽自予來此山與山相昆  
弟又將三昧手於焉小遊戲向來蜀之日往往名信吠  
迢爾付一喙千載息攘袂變滅今安在但有山繞翠可  
憐七十翁嬉遨尚童稚坐聞酒如川留客爛漫醉亦思  
翩然去芒屨踏初霽就林煨短茁帶泥落花蘂清絕恐  
無分得已吾欲已那堪迫暮末來日能餘幾城外土饅



頭區區誠過計卓哉荷插翁曠達未可毀

仲實示中秋詩甚恨不同此樂用韻一笑病中殊無思也

誰其持冰炭晨夕闔我庭遙哉水帝后乃有此寧馨不受百藥鑄奈何頑且冥是時八月半無雲天正清居然作灾怪流汗如翻瓶捕逐出八荒弱步愁缺而予方

真酒賓主更醉醒作詩調明月顧兔下乞靈飲量聞小減猶能吸南溟客疾掃已空蕩蕩白雲局何必傲淵明

若問神影形吾生七望八肚胸知幾經不樂復奚為羨  
子鬢未星何時定一來眼中見驚停軟語到夜闌發火  
烹中冷誦子新詩篇我亦能靜聽

同賦開元宮避暑詩

避暑如避虎山林每逢旃誰知浩穰內自有清靜緣同  
來戴牟張作計良亦賢是時正流汗赤日行中天勞坐  
苦役役何異烹魚煎居然得勝地神觀為爽然涼颼起  
珍簞妙香汎瓊篇坐客易生感泉隱獨談玄靜者躁之

君方寸湛其淵勿謂火勝月此意諒默傳我戶隔珠庭  
遙企玉真仙仙遊雖云邈肯遂大化遷曲池況未平中  
多蒲與蓮更有離離者使我增愁涓

次韻仲實秋夜

空庭兩犀株吹香滿前軒頗疑顧虎頭幻此金粟繁或  
是乘鸞女月窟分天根更與瀉浩露盡洗蜂蝶喧若無  
好事者為我載一尊而我子張子古誼夙所敦肯將新  
詩句到我羅雀門何殊小山賦欲招楚客魂犀首纍佩

印陋矣不足論老我罕出戶東牆甘曝暄應同花下醉  
式副我願言

送家自昭長慈湖

眉山鍾神秀翁季天下偉直到仲虎輩奕奕殊未已家  
為文章家百年兼兩侍存翁名侍從願山古膚使秘書  
性具存文脈益演迤前除羅玉樹乃復有令子超趨簞  
不羣老氣壓紈綺早歲瑟憊篇短繁午夜几要渠紹編  
剡教示正勤止家寶未輕出吾儕方側耳一朝著斑衣

束書事行李堂上白髮翁為爾顏色喜濤江日日靜酒  
酣可以起慈湖在何許精廬屹其址我欲鼓枻游浩渺  
曷涯涘長風駕高浪瞥忽可千里如此寧不超蹕厲前  
無比須知歸宿處其道元甚邇鯉庭尊所聞固自有源  
委願毋厭凡近讀書愈窮理脩程與遠業亦從今日始  
合沓來衆譽烜赫繼世美持以貽家尊良足當甘旨

贈陳一齋

謝公文物郡山川如錯綉轉眼成蕭瑟富覽寧復有自

我識君子再挹中嶼秀卓犖妙言語經術更兼茂早歲  
六典書嘒嘒發孤味春官失分寸苦不入吾彀天意將  
有待本郡頌客授鄉人弟子行月旦師友舊朝隨貢篚  
入莫處儒席右固知致遠業當時無近售多士皆景附  
三道共輻輳而我初何心高下隨所就澹然守吾一擁  
書坐清晝交帟謝俗物冰雪凜懷袖獨於吾輩人倒屣  
惟恐後誰云一縫掖不如鴈門守好賢篤緇衣同心藹  
蘭臭况乃諸老翁夜艾耿殘宿殷勤見尊禮能使風俗

厚頗憐世議隘或用儒為詬元氣須愛護大體必爭球  
誦言百僚上大作萬間覆君當自此升儒蘊獲盡究是為  
斯文福豈弟神明祐平生聞人善喜氣如饋餽作詩繼  
魯頌千歲俾眉壽

送王仲明長明道

君本鄴中士行向建業去故都多感慨盡在登臨處乃  
心所師仰當年上元簿閉門玩微言春風會歸趣

和馬侯游何山

自還吳興居頭童而齒豁信意時出教所覽深以廓何  
山在何許細路穿木末躋攀不憚勞歷歷見郭郭晴嵐  
堆紫翠正在吾屋角世事苦至並我但專一壑嗟彼競  
利者為計自各各緬懷安定公雅合居臺閣平生惟自  
道未有輕造脚謁從海陵來姑蘇亦暫泊湖學得公重  
學子有攸託南園慶歷間六老曾會酌當年馬太守高  
誼誰能若直卿為之記文字誠磊落厥今同姓侯胄次  
有活著長篇俄寫就傳寫腕欲脫昨聞上湖墳寒色正



錯莫樵木不為禁  
宰樹嘆濯濯新祠已卜龜  
華表佇立  
鶴神游倘來下  
曠達離塵縛

送呂錫入閩省觀

吾友鄧善之從游多佳士  
其間最妙齡英英有呂子  
虛  
中風寒處子獨鍾秀美憶  
昨初過我丰度如冰峙不  
肯  
逐利名惟耽玩文史閉門  
肆探討往往窮日晷刻意  
逗  
幽深飛辨摘謠記我欲濬  
其源融液會衆理何事遽  
索  
去明發事行李八詠須恣  
游三山亦甚遽人生著綵  
衣

侍官真樂只行當拜家慶親顏為渠喜非復舊阿蒙有  
子能如此便可置膝下家室勿輕視

聚星堂

并序

潁川周宅有聚星堂世但傳歐蘇白戰詩句晦翁在  
建安固作新陳氏之考亭始繪荀陳聚星故事於屏  
上攷訂指示甚詳且為之贊世或稱先生為考亭蓋  
誤贊中一語若不滿于膝上長文文若二孫者然其  
意則為侂冑發也陳氏乃晦翁之孫故曰課忠責孝

獨慨余來此橫幅意亦是時所作以便卷舒爾今考  
亭已燬而此本獨傳於世豈偶然哉曹士開博雅士  
也能寶藏之因識于下方云

建武重名節狂奴態猶故客星復何事一夕感乾度風  
聲激未造駢首死黨錮而五百里內乃有賢人聚行行  
望德星高陽里中去德隆則星晷時網不足與元氣之  
所全政在簪盍處乃知忠賢類天每下其顧二老甘隱  
淪四海起尊慕有如子孫行已是廊廟具深期任世道

相期扶國步皇路方險巖傾軫當急赴赤手徒捧塊詎  
障奔流怒濡迹本掾時其忍諉諸數事益有至難竟乖  
天所付汝南榜堂皇考亭繪縑素室有聚星事四遠競  
傳布老眼苦昏暗見畫如隔霧卷還坐太息冰炭擾百  
慮

史彥明致樂堂

高堂有壽母黃髮映兒齒天方畀脩齡康寧燕多祉怡  
然人子心何物堪倫比和氣為愉色皆自深愛始郁穆

涵春風融怡妙天理此是謂至樂樂則焉可已再拜為  
獻言忠養極娛侍隨時換輕煖每侍進修瀘初非假外  
內至樂皆在此況能以志養先意而承旨鮎鮐故自珍  
懼不如菽水有時平反歸兒喜親亦喜吾以名吾堂致  
樂義最美試看紀孝行昔曾今日史會有邦人士升堂  
奉醇醴俾爾登期頤俾爾宜孫子

次史德載韻示諸孫

我家無絳帳貧賤人所棄忽聞唔呶聲老懷倍懽喜比

隣亦驚怪，拔眼不敢睨。先生史魚直，自謂骨不媚。珠玉在短褐，深藏未輕市。而況門閥高，指不屈第二。肯應童蒙求，爲爾覺昏昧。袖中一卷書，傳之自名世。爾幸近得師，盡勉從學志。人品分中下，教法初無異。采芑復采芑，我田自新美。那似斥鹵濱，彌望荒白葦。短園圍敗屋，不見花藥麗。賴此小窓明，晴光開憲霽。日長書好讀，所講先孝悌。泥牛共土狗，勿復事嬉戲。後池蒲稗深，竟日羣蛤吠也。勿向池邊照影，如孔翠低頭。勤筆硯，翻墨滿裾。

袂男兒十四五年紀非幼穉不妨笑阿翁憤憤長如醉  
先生有雪霜嚴威不汝霽今朝發長吟閉門苦覓句老  
年謝九藥殆似陳無已區區古人心今人知者幾平生  
潁川教不作功名計但令本根在浮華終易墮

侍輅院叔過山廬意行甚適夜過半乃知醉卧  
山中而親友或去或留因借淵明時運暮春篇  
一笑

宿戒親友蓐食詰朝攜幼偕往歷覽江郊鳴吭在谷時

雲在霄灼灼桃華青青麥苗且行且扶且憩且濯橋有  
危躡湖有遐矚古人惜春常若不足又一月多何如其  
樂狷者隱淪狂者詠沂千載彭澤異致同歸匪怨匪荒  
天趣發揮大阮靜淵心慕以追暑嬉我林夕偃我廬或  
醉或逃聽客所如林墮片月室耿殘壺一笑成詩良非  
起予

再和

摩肩趨利市門之朝夷然抱關市也亦郊一念靜躁懸



隔壤霄旱火永焚實歟我苗飲水內熱其何能濯大播  
昧昧近或弗矚我有至境反觀內足寂寞寬閒自得其  
樂茫茫禹跡海岱淮沂遊子倦矣故鄉如歸牛羊在野  
舉肱一揮既入其豈夫又何追八荒我闔天地我廬六  
鑿何有一席晏如西風籬落剝剝斷壺靜以觀復閉戶  
者予

陵陽集卷二

欽定四庫全書

陵陽集卷三

元 牟獻 撰

古詩七言

長江圖

漢川影落鸚鵡洲  
金山鐘到多景樓  
老龍幾載卧寒碧  
中間不斷萬古流  
晚來雪浪大如屋  
澎湃舞我一葉舟  
舟移岸轉知何處  
離離烟草令人愁  
說與渠儂莫倚柁

轉帆別浦盍少休此圖此景俱可惜展玩不足空白頭  
家在江水發源處何時還我舊菟裘

山水圖

凝塵不去鼠行几剗見巨然與千里脩眉拂畧遠意開  
碎點孤煙樹如薺髯龍鬱鬱新翠搖我覺鄭公殊嫵媚  
懸知自是棟梁具歲晚霜雪須飽試舊聞北岳鍾馭寒  
長松造天冰裂地蒼皮玉骨不受凍礪砢千丈世絕擬  
誰能為我試貌取竒姿偉狀來眼底張君平生飫所見

推復愛此秀而美雖然莫作差池觀老壯險夷同一致

鳳凰山澗石圖

南湖山人小戲劇夜半釣天閨拊擊音節疎宕鳳起舞  
至今筍簾遺樅業君來訪古用此時地老天荒何處覓  
矻矻渡盡澗與岡确聲徑微予趾棘重華忽已三千載  
鳳鳥一去無消息石兮石兮奈爾何搔首湖漚徒佇立  
羣仙拍手相勞苦但知簸空吸寒碧殷勤問翁今何如  
方瞳炯炯映丹頰頗記三生石上無讀書雙趺雨苔澁

歸來舉似翁一笑飛鴻踏雪那可憶予其為我謝羣仙  
不妨天遊復八極袖中行記真畫圖留向人間作奇特

題洪崖先生出市圖

洪崖先生住何許支離擁腫之為伍蕭然行李偶出市  
束書瓢劍畧可數自謂生在三皇前野鹿標枝何太古  
當時但以結繩治書中正復作何語興馬絡頭亦復來  
雪精胡為馬絀具只呼張老無不可面謾三郎直戲侮  
承平無事相娛嬉力追遐風來湛露一朝恍惚思草昧

此意似已厭繁牕千邨萬落荆杞生宛是洪荒一風土  
袖中紙驢不吃草拍手還向洪崖去

王維畫孟浩然騎驢圖

窮浩然老摩詰平生交情兩莫逆也曾攜去宿禁中堪  
笑詩人命奇薄只應寂莫歸舊廬此翁殷勤殊未足作  
詩借問襄陽老詩中猶苦憶孟六悠悠江漢經幾秋一  
夕神交如在目分明寫出騎驢圖丰度散朗貌清淑更  
有個儻一片心不是相知那得貌行行復行向何許酸

風吹驢耳卓朔向來十上困旅塵驢饑拒地愁向洛不  
如乘輿且田園萬山亭前大隄曲鯁魚正肥甘蔗美雞  
黍可具楊梅熟一樽相與壽先生醉歸勿遣驢失脚

和王寅甫御史遊南山韻

平生愛山苦趺足况此對面美冠玉也曾杖屨極躋攀  
稍度灣碕轉虛曲徑踏青螭脊上行所歷漸高山漸束  
紅亭白塔出湖外下瞰諸峰等臣僕祖禪晏坐服生獰  
法席宏開儼清肅何人梵唄呼僧定劃然透戶如擊筑



浮嵐暖翠忽紛披依依精舍傍修竹至今猶作呬唔聲  
飽食頗慚空洞腹崎嶇竟日亦已勞應接滿前端為目  
道人對境了無羨折脚鐺中煨脫粟小立為爾起深悟  
願事埽除甘播掬崢嶸歲月苦難記三寸裨杉俄立鵠  
山中老宿亦向盡訪舊無人空感觸細評道人似豪家  
臺殿耽耽枕岩谷當時氣象雄一方誰教却火燒糜竺  
十年舊觀未全還金錢奔走傾緇俗何山試問何所有  
一溪清冷嗽寒綠入門使我意也消不省人間有華辱

殆是高人勝士徒山靈笑許茲論篤曠蕩幽深兩俱勝  
胡不重游勇奔鹿多病歡娛久去心良辰美景寧相屬  
昏昏午窓俱坐涼跳丸西走白日速夜來可奈風雨盡  
盡力催花亦良酷痛殺新紅三萬片園林慘澹餘老木  
作詩遣愁愁未遣那知翻作愁根窟古人真欲焚筆硯  
苦語殆可書紳笏頗憐阮屐共嵇鍛更笑周妻與何肉  
留連一物即是礙羨君開襟少頻促愛詩乃復宜相似  
句語卓犖光透幅倦還始覺心和平人生有手莫操牘

送陳正德教諭常熟

此邦自是高陽里陳太丘家好孫子十年閉戶養雋聲  
我先子後一時起前時送兄今送弟綵衣拜親親為喜  
人言昆令而季強羨君清標如玉峙善和尚有千卷書  
一一窮探親夜几新詩那更翻手成便當拾芥取青紫  
小管甘旨束書去且煩私淑青衿士天公應念友于情  
任國相望纔尺咫蘇州明白照兩縣正好高吟清影裏  
吳江定作對牀留笑隔垂虹膾鮮鯉托好我已三世深

待老敢當二生侍蕭蕭風雨起送客萬里飛鴻看雙背  
端明老子舊家聲一舉先鞭從此始

楊求仁路教遊何道山之明日余始自洞庭歸  
恨不與雋遊漫趁韻一笑

君能匝臘過苔水我正絕湖尋橘里人生有數會不免  
先後差池數日耳天教新年暫相見握手如獲丹與砥  
畧似德公上冢回徑入就談傾底裏如聞前月清興發  
杖藜曉對南山起蒼官掀髯自虹舉清流照影時鵲峙

我歸已晚不得陪脚中平生信有鬼獨留詩卷使我和  
思枯預怕搜脂髓小溪深處是何山藏機一句無多子  
當時言下誰領會只認泉石為對履至今遺跡記東坡  
遂使此山同畏壘擬議固已輸一籌躋攀銳欲窮寸晷  
真境不樂有無間更使高人為標指先生醉歸方熟睡  
凍蠅一任鑽故紙

和顧伯玉陳朝檣

長城大雄古剎裏一庭老枿質已死依約僅見左紐紋

垂柯布葉乃如此相傳云是陳朝檜欲論往事皆死鬼水  
懸雪跨黃塵盡何煩阜英相料理只應孤根鐵石堅不  
怕如壺之赤螳四旁那復有生意生意却從中心起陳  
氏機淺根枝弱雖有子孫何足倚崢嶸霸業隨手壞五  
傳不堪重屈指君語居然多硬語千載興亡雜悲喜隋  
唐而來尤可感區區未數錢與李

寄閻靜齋徐容齋二學士

代人作

斯人宗工國司命容齋有容靜齋靜海涵岳峙俱偉人

心同道同不同姓向來先後持玉節共仰福星在吳分  
一公歸領集仙班一公繼登六鼇禁大名本是宰相職  
高臺書帷地步峻導密亦是翰林長快埽槐廳消息緊  
天教兩翁轉鴻鈞赤子到頭合蘇醒東南秀士頗不乏  
當年著意極搜引而今造化況在手想見姓名猶見省  
石生已起有溫生我愛莫助德恹恹苦為百草憂春雨  
坐待風霜發苔穎

善之入雪蘭臯置酒小詩紀坐中事

病翁禁酒仍禁脚不省人間有行樂主人善最客善之  
邀我來同雞黍約清樽快吸船落碌頗悔從前謝杯酌  
故人久別如此酒一時傾倒慰離索更擘新筍供春淘  
孤泉槐葉未須學殷勤入鼎煮過熟老饕恣吞不勞嚼  
人生難得是合併開口一笑良不惡呼車載我雨中歸  
阿香推車散飛電分明戒我輕破戒故把春衫都濕却  
我亦投牀作雷吼無數殘紅枕邊落

倒撐魚船上灘圖



倒撐魚船逆上溪六鷁過飛風退飛呂梁懸瀑行越之  
灩澦如象人西歸一笑恬視險與夷同波委順未必非

趙石心詩

試問吳兒歌小海何如廣平賦梅花一片石心元不死  
平生不落徐庾家趙子陳陳有胃府雲根半夜生槎牙  
有時盤空吐硬語更覺世上浮且夸誰能為熱青藜杖  
苔莓荒盡天祿與辟邪

贈劉心月

心月還將眼為月秋空表裏俱澄澈閱盡世間強與妍  
分明無處藏毫髮我方回向心地初含光自照非外譟  
平生最喜阮嗣宗臧否兩字何曾說

送陳正德長慈湖

并序

陳正德甫本齋端明公之孫姿稟穎異而氣象峻整  
與其二兄無逸正則相後先克持世業蓋本齋師將  
實齋友湯東澗而聞之魏鶴山真西山者也師友緒  
言講之甚悉以選為慈湖山長兄無逸取東澗送本

齋教授金華詩和之以送而送者亦皆和焉楊文元  
自號慈湖在慈溪其鄉里在樂平其仕國遂有兩慈  
湖相望千餘里慈溪之慈湖其在樂平之慈湖否耶  
不可知也或謂莫妙乎吾之心之神變化無方俛仰  
之間缺拊海外安知慈溪之不樂平乎然則正德之  
樂平也亦且三月聚糧撰日而戒行乎告行於嘗所  
往來問途之所出孰為近遠乎其既至書院也亦且  
循序而進歷階而升堂乎集其學者正席而登義乎

正德曰若是者固知之且慈湖每舉心之精神是謂  
聖者語其徒亦未嘗不曰孝也敬也實也忠信也誠  
使學者極高明而道中庸下學而上達盡心知性而  
知天其有不至於聖也乎予深異其言夫義理無窮  
其是非疑似不過毫釐之間講去其疑而求其是可  
也昔呂成公平亭而議陸氏之學以為勇於求道之  
時若不由階序然毫髮之偏不敢安兼聽並視却立  
回顧不造於至平至粹之地弗措其語可念也盡以

是求之焉遂和詩以贈

本齋之孫盛詞華下視流輩十倍過家書雖散尚千卷  
其奈儲無儋石何二昆研席相與共勘辨不遣毫髮訛  
一朝束書慈湖去慈湖之學自象校人之高明騫高遠  
不由梯級陡上坡而其下者保固陋終歲無路登嵯峨  
萬形惟實乃無弊此道自古傳思軻慈湖論心論無我  
真意初不煩鐫磨虛明一語更超絕不肯與人同其波  
却笑禪宗用心錯我每讀此毋麾哦微言日絕諸老盡

獨抱永感如宿疴君家詩友講貫熟持之以注豈在他  
我耕我獲粒我腹而彼徒夢笠與蓑

題喊泉亭

大龍小龍天下絕水簾高掛三千尺呂梁懸水那復言  
便應壓倒棲賢峽我來覓水洗雙眵怪底老崖枯欲裂  
龍公何處抱寶眠悶蓄精枯未渠泄誰知水火本無根  
重陰可以陽氣徹倚空長嘯山為開以虛為感感尤烈  
千山龜龜方泣寒鍾乳淙流忽飛錢珠璣噴薄雜霏霧

瓊瑤傾瀉濺白日若非捲取銀河水那得變幻在呼吸  
看泉須看無泉時自無而有乃奇特龍公作事真狡獪  
吾儕用意亦奇崛經營小立看未了洞門忽已雲霏濕  
龍公龍公可以止何如翻手作飛雪便將豐年報明主  
蒼生赤子俱函活火雲六月汗如漿更為渠儂洗炎熱  
一笑回首謝龍公神用俱停天地寂

再和楊求仁何道二山韻

雪堂西席雪江水廣文先生是鄉里此翁平生事崛奇

欲上虛空鞭駮耳邇來深藏老鋒鏑未許容易試越砥  
插天光氣尚歷歷若為著渠岩石裡仲華本願郡文學  
百年功名一日起崢嶸今不少自貶吾道毋乃太孤峙  
苦將新句調山靈不遣陳迹蹋死鬼世俗貴耳不貴目誰得  
其皮兼得髓翰林主人墨客卿會將此事全付子吾衰  
正復何所用兩錢之錐漫直履固知梅老難抵當夜半  
偏師來研壘襍硯囊筆俱堅坐爾以不戰淹客晷天地  
凍合萬木僵軍中頗怪多墮指春風呼酒為解嚴十部



從事賢一紙

律詩五言

和孟能靜總管西莊閒居九日見招

風物居然好亭池穩處安上饒初奏最西墅且追惟朗  
誦詩千首高眠日幾竿放懷閒孟浩乘興過蘇端近局  
人人喜閒居事事寬扶筇差可強投社亦非難歲月期  
背功名付鼠肝相將斟壽斚一笑拂塵冠紅蕾春猶小  
黃花晚更寒摩挲話銅狄惟許鶴來觀

張彥清學士以使事來杭訪問忠烈王子孫蓋其先皆自保定原系實同迺合二譜聚族謁廟叙拜厥誼甚古仲寶賦詩以紀錄寄山中輒和之

有偉秦咸望厥初保定人風雲際興運茅土褒勲臣端自積餘慶非徒榮一身聞孫藹令譽抗志矯秋旻嗜學今該古問安厝復農釜方感義氣內譜存宗親膚使光華盛輜軒采訪頻迺知清廟器俱是崑山珍分派既同

出馳聲尤絕倫仙班重典領宥府久彌綸揭節方宣化  
揮毫着爽神應嗟遠俗薄欲挽古風淳鉅族同三春高  
情隘八垠焚香肅遺像序拜欣嘉辰頗屈彥清貴寧嫌  
仲實貧綿延百年緒翕合一家春樂只飲此酒勤哉書  
爾紳尋盟諒愈篤踏道毋胥淪暫別山河阻終期事業  
新相從萬里去伐鼓起通津

和梅君遇退閒

鞅掌徒勞耳人皆羨子閒惟甘寄市隱勿苦憶家山街

鼓晨眠穩丹田夜氣還蕭然無一事意已出區寰

贈厲白雲上人

雙徑聞鐘罷而今夜熟眠事須紅日上身在白雲邊古貌應違俗高吟不礙禪爐頭煨芋火相對各欣然

羣羊踏菜畦戲作

活計元堪笑毛羣尚見欺蹴蔬元匪夢樊柳竟何裨正爾敗諸葛從何捉左慈若鞭其後者猶得養生規

次韻八詠樓

八詠樓中景都從筆下收使君容此客詩卷重於舟我  
頗曾三至君應倍四愁瀟湘與章貢千古只同流

贈葉一山

氣岼有如許當年乃鶚冠覓官談笑易知己古今難膊  
聳如山瘦心堅可歲寒郎潛有顏駟博士却儒酸

題詩禪方丈

切忌犯正位須教截衆流聞鐘應已悟縛律未為遁室  
小纔容膝詩成自點頭出門忽大笑明月一天秋

仲實踐約來訪又得韶甫方君同行數日語蟬  
聯甚慰五詩寄意甚高次韻為一笑

重腿嫌卑濕那堪暑雨稠拋書事樂裏敲枕聽溪流何  
用攄孤憤惟宜號四休誰能訪生死天際有來舟

江河去不息金石仰而觀但未隨流轉安能制汗漫親  
情人所重友誼古尤難二士俱來意遙知可歲寒

紅帶承顏色青霄奮翮時猶尋雲弁約肯為水亭嬉快  
婿豈嬌客老翁真小兒五噫且勿作舉業樂齊眉

陽羨長腰米儋州禿鬚翁相傳作佳話好為表遺忠收  
檻溪山勝從容詩酒中南湖未歸客歲晚倘來同  
平湖好亭子高出亂雲層一水作之字衆山羅豆登襟  
懷為爾豁杯勺尚能勝却笑鑽故紙窓中效凍蠅

答術者

賢關夙多士子獨抱遺經衣尚舊時褐眼誰今日青直  
須行萬里未許赴三星會友誦佳句等閒生鶴翎

送吳古邨入越

笑我甘苔隱因君動越思綠波元可鑑縞髮已成絲共  
說修齋老仍懷閱道時匆匆還別去江海入新詩

次韻寄衛山齋

蜀客嗟留落甘為學圃遲年華空自老心事復誰知未  
有盡簪日還須上冢時緒餘何足論相對但期期

送周東甫教授餘干

并序

太學賢士之闕異時英雋如林冠蓋如雲跡功名富  
貴可立致一旦高攀遠蹈攜書入山林惟恐其不深



且密也蓋久之而稍稍出為時用何進之難耶然流  
落顛頓之餘尤為人所愛重譬如珠玉犀象之珍要  
未易煨歷之也吳興周君東甫以前太學諸生教授  
饒之餘干州人皆謂此未足以處東甫也東甫笑曰  
曩使吾幸而久於太學或四三年或五六年又甚者  
十餘年以得一第而又幸在前列法得為學官須次  
且數年幸而得至其官豈有異今日之為哉而何所  
寘淹速喜嘆於其間迺亟裝為行予聞而壯之以東

甫辯博而文通敏而能何適不宜况博士非冗官可  
行其志餘干非陋邦可施其教行矣東甫久鬱者其  
發必大其進孰禦子姑自愛重敬修其可願以俟其  
遠者大者焉是邦自忠定公以及近世之諸賢緒言  
餘烈尚有存者詩云高山仰止景行行止敢以是為  
贈言詩曰

博士廣文館遲君二十年新邦重于越舊俗記諸賢

謂古

心辯峯東  
潤碧梧

鷗省南風至臯比右席專暮年尤惜別搔首

意淒然

和雨中

但聽四簷滴真成萬事休  
空却就誰飯高樹繫吾舟  
那忍田翁笑還憐木偶流  
老人渾忘事畧記酉年秋

薄宦亦良苦救圻泥濺裘  
陳紅猶不足太白幾曾浮  
賴有兩詩好聊寬一日憂  
天公應念此未用祝篝甌

水却圖

山色濃還淡孤村水遠之  
俗塵飛不到野老佳偏宜  
碕

岸疎疎柳茅簷短短籬  
小舟敲仄過便是少陵詩

陵陽集卷三

欽定四庫全書

陵陽集卷四

元 牟巖 撰

律詩七言

幼農日漫成

白髮紅顏烏帽翁  
年年從爾覓年豐  
爭看漢詔來身畔  
便覺幽詩在眼中  
且喜畦秧三日雨  
莫愁花信幾番風  
我今亦是惰游者  
不稼而禾愧食功

景定甲子理宗嘗以顏曾傳道配饗下問詞臣  
越咸淳丁卯昉以曾子子思升侑孔庭蓋推本  
先意也先臣所被宸筆藏之私室會軍學撤舊  
廟崇新閣願得摹刻其上而某固未敢也府教  
張君遂詩以成之後之觀者將有考於斯文謹  
用韻以謝

在昔前朝帝問頌龍樓當日正承顏曾思參侑褒崇后  
堯舜相傳密勿間適駿先猷昭若日於皇吾道重于山

老臣獨抱烏號痛不及臨雍扈從班

藻有嘉魚有自頒師儒樂育士懽顏宸奎恍若從天下  
傑閣崇成不日間要識道原觀泮水坐令文物盛黔山  
熙明殿下槐龍舞便合歸陪講讀班

荷花辱於淫邪陷於老佛幾千載自托根濂溪  
而後始得以其中通外直者儕於道而近世魏  
鶴山又推本周子之意取澤陂之詩所謂碩大  
且儼者歸之君子焉明倫堂後新池驟著花教

授遂見之詩且有取于周子香遠之句寄興遠  
矣因次韻

道中何物不生焉頃刻能開碧玉蓮根脚好時花發越  
源頭活處水漪漣喚醒佛土從前夢細繹陳詩最後篇  
霽月光風真灑落千年此意後誰傳

和張教雨詩

占雲日日問何如物意焦卷重可吁微灑人皆憂未濟  
積誠我自愧中孚滂沱幸已符先兆穠蔭行看獲上腹



此事相關情正切吾儕初宣事誇談

試院和李提管韻

聖世旁搜盛武宣幾人捨耒嘆胼胝武成宜取二三策  
稽古還誇數萬言充棟此時唯恐後著鞭他日竟誰先  
空筌相對真堪笑半夜魚龍已變遷

無黨為東岡賦遠遊余卧病空山聞而壯之和  
韻為別

鬢絲梅雪兩鬢髮底事征車又指南自是曾遊習蛙黷

不妨小住話魚蠶  
摻袂中歲情良苦  
秉耒平生分所甘  
若有書來訪生死  
白雲多處是吾庵

次韻無黨留別

濤波萬木撼新秋  
却笑茅廬似葉舟  
我但蕭疎眠潁尾  
君方矍鑠向壺頭  
早涼已喜無殘暑  
老別當須似壯遊  
黃木扶胥最奇處  
想留句子待浮洲

和劉朔齋海棠

人物當今第一流  
以花為屋玉為舟  
曉粧未許褰幃看

夜醉何妨秉燭遊錦里宣華思舊夢黃州定惠起新愁  
何如歸伴徐公飲穩結一巢花上頭

和善之寄遊何道二山

行盡千峰日未晡齋餘扣檻喚紅魚有梁扶棟神輸巧  
一鐸鳴簷樂出虛那得詩情陪島可但誇山色勝衡廬  
老禪趺坐渾無語案上旁行幾葉書

兩人相對說蠶叢蒿櫓堪嗟滿故宮忽見畫圖如雪外  
不知身世此山中餘生纔寓一梯米獨往殊欣六尺蓬

寄得詩來何處覓南湖蒲稗沒鳬翁

送李仲賓同知

一別丰儀十載間  
新春再見為開顏  
鷄林傳去詩如錦  
龍節歸來鬢未斑  
白日絲綸端可待  
平分風月早須還  
此行已滿英雄殼  
同上烟霞紫禁班

七兒應復同客飲  
櫻桃園摘新歸以遺親  
用其詩韻識所感

聞汝相隨入翠微  
歸時晚色已淒迷  
櫻桃為喜筠籠重

燕子休嫌茅屋低我老恐妨兒輩樂新詩欲繼古人題  
年高自覺摧頽甚送客何嫌過虎溪

尚記當年薦寢園百官分賜荷恩淵帶青絲籠空餘夢  
搔白頭人苦不歡詩老誇稱作崖蜜野翁驚看瀉銀盤  
南山見說紅千樹鳥雀兒童任入關

次韻王寅甫

共惜餘春賦式微莫教當飯失苗藜行行直度南雲北  
得得還尋東院西白髮已應隨日長黃鸝更與盡情啼

試哦小雨輕埃句絕勝前邛滑滑泥

和陳無逸九日

揚鷺設醴奏絲桐九日臺頭詠渚鴻  
宣遠風情雖曠代淵明霜氣直橫空  
卧龍自命初非過戲馬當時未足雄  
莫笑東籬太岑寂南山長在醉醒中

萬事真成一繆悠西風節物若為酬  
鴻饑未覺他鄉遠菊老誰同此日愁  
已洗眇昏看白眼更扶衰病費丹頭  
吟情笑我今何似廢筯寒泉溢不流

和張老山辭免運同

曾驅海若傲波臣底事年來苦乞身徑為尊鱸稱退掾  
要將蓑笠伴玄真流空素月光難掩過雨青山老更新  
祇恐未應閒袖手鹽梅鼎餽正須人

和李侯九日

自愧羸餅在井湄頗思時復一中之平生殊欠題餽字  
今日堪憐對菊時烏帽已忻新得酒白衣誰似更攜詩吳  
興太守真三絕爛醉輕教玉笛吹

幾回九日九江湄杖屨從容信所之下  
瀝遠尋觀獲處東籬想見醉眠時共陪今日吳興守猶記當年已酉詩  
我亦平生知所慕飄飄衣裾任風吹

賀張老山得代

富貴方來本不期湖山徑去豈無辭  
衆咻直欲齊爲語一笑姑存鄙與譏  
難辨求田還問舍且教入務并尋醫  
幡然強爲招延起從此岩阿爛蕨薇

別趙子昂



粉省星郎蹋曉班暫隨使傳走日間荊州利得習鑿齒  
江左今稱庾子山君意頗為尊菜喜人情爭羨錦衣還  
但憐老病匆匆別白髮如何更可刪

送蕭子中

誠齋手摘千巖藁詩律清森近代無仍世科名香未歇  
諸孫文采蔚相扶橫經為喜臯比穩覓句何妨鶴骨癯  
會見蕭生起東海幾年志抱一時攄

春雪

一冬只辨作嚴寒剪水飛花事竟難閉戶不知春意動  
撲窓忽覺雨聲乾頗聞萬事正雲集何處一簑如畫看  
但喜畦蔬得蘇醒從今小摘有餘懽

送羅漢臣

向曾平步上仙輦拂袖歸來氣尚豪自有西山堪拄笏  
不妨右手且持螯凌雲載酒渾如夢泛雪回舟也自高  
顧我餘生復何事閉門三徑削蓬蒿

過洞庭山書湖中所見

欲談舊事恐悽然誰遣奇觀墮我前  
驚陣萬屯湖為黑  
冰鬚千尺水皆懸  
無多風色似天相  
阿那人家疑地仙  
更有一般堪羨處  
嫩醅綠蟻醉無眠

送趙蘭臯教杭學

一似彭城向潁時  
重開講席整冠綈  
青衿喜得新師範  
白髮能言舊尹釐  
獨冷定應非熱屬  
衆芳况復異凡姿  
不妨且作回翔意  
直上搏扶亦未遲

送种南仲主簿

六客堂前翠竹屏雙谿館下碧麟生遍經此老行吟處  
可是常行簿領人吏為求蠶覓休假官因祭竈請比隣也  
知矮屋難淹滯且與空山作好春

題用拙齋

柿林園裏伍文黨金谷叢中石賈塵漫說愚溪誑當世  
苦將巧宦目他人何如杜老幽居處一似無懷太古民  
說道書齋名用拙可存吾道樂吾真

曩在長沙有遺以石山今舊物雲散此石以堅

頑獨存漁莊為賦九芙蓉之句遂以歸之目為  
壺中九華致其悵望

當年持餉自襄東共載尤憐翠色濃莫向壺頭疑蕙以  
要從華頂看芙蓉諸郎自是階庭秀此物聊堪筆硯供  
却笑仇池無與伴圖中悵望九奇峰

錢留忠齋丞相

并序

趙清獻公自衢過永嘉曾文清公自越過姑蘇皆以  
八十之年就養子舍此東州盛事也大丞相忠齋留

先生視兩公名德同鄉里同壽年同而東閣府判將  
迎安輿以踵芳躅邦人士日夜望者余以老門生敢  
援前比賦小詩贊公之行

咫尺柯山路未賒人生迎養最堪誇續茶山集過吳下  
看戲綠堂來永嘉八袞高齡忻子舍同鄉盛事屬公家  
邦人莫笑門生老日日花間望小車

予與會孟同游古心先生之門死生契濶今見  
其十年前與仲實詩帥初記和予亦繼焉

擾擾人間萬事塵舊交無奈白頭新此翁固是同門友  
今日真成曠世人千里賞音知絕識九秋落木見橫陳  
也休頻把遺篇看說到銅人更愴神

和虛谷韻簡唐月心

平生自分只虞毗況是而今一槁枝江左何人譚太極  
洛陽有客賦新詩物情於我真疎矣吾道非公誰與斯  
未必梅邊柳索笑微言好與共參之

餞陳正則學錄長城

本翁十載郡博士司鐸官清亦未遲暫屈吳淞湖海氣  
來看陳檣雪霜姿近家聊喜片帆穩遠業當為萬里期  
老我柴扉看岑寂不妨時寄畫溪詩

再和虛谷韻

肯隨世事事夸毗得得來尋霜雪枝苔曲新添漁隱話  
陵陽別論派家詩卜隣已喜同王翰到處猶能說項斯  
不是晚來投社去杖藜兀兀欲何之

和梅遇二詩



除却壺中日月長不知何處是真常等閒鉛汞自生死  
從古薰猶更臭香糞掃袍邊覓鍾呂步虛曲裏換伊涼  
何當月朗風清夜喚出胎仙舞一場

行止非人所可為疎慵何事不違時已驚夢裏雞鳴早  
翻笑人間鶴到遲剡曲船回空此興洞庭飛過怕渠知  
依然身世溪亭上售用新添五首詩

高賢孺厚齋使君之令子自番來雲訪明親舊  
此意甚古歲辛亥余識厚齋金陵通守之舍堂

陪朔齋劉公飲海棠花下俛仰四十五年追念

悽然

厚德流光報必豐當年齒穉已奇童  
蘭芽秀擢孤根內華表驚呼一夢中  
肯向陳人論世好絕知新句有家風  
海棠花下看鍾蔣說著令人念此翁

和王梅泉黃靜齋載酒問花

逃瘧形容兀似槎誰尋獨樹老夫家  
高人早擅無雙譽佳客爭看第一花  
已為義尊成醕酌更誇信筆寫葩華

斑斕小草真兒戲得借餘光亦所嘉

吾五十年間未嘗一杯自壽汝曹所知者今乃  
力營甘旨為七袞慶事出創見欲深避去復不  
可使汝曹他日懊恨亦如吾者小詩答渠勤意  
丙申正月十五示諸兒

七十新年未盡窮香醪滿泛饌尤豐便同五鼎為吾養  
汝有雙親勝迺翁一念自能通造物諸孫更與振家風  
花燈壁月今何夕春在親情笑語中

十六日謝郡官兩學及鄉里朋友

七夕空餘永感情南園養病閉柴荆一朝破戒為兒子  
四坐合併表友情地主每能容枯枿天公特為放新晴  
餘年得此今多幸白髮傾敔一醉成

十七日謝趙子昂孟能靜及諸親友

兒將白髮共嬉娛敢意高軒訪敝廬七袞年齡同絳縣  
諸賢詩句過黃初茵芝那解出枯朽冠蓋便能傾里閭  
爛醉休須問生理貧家今有百車渠

送楊興府

細語當年別後春  
驚心寓縣尚吹塵  
濁醪易貫新豐酒  
衰俗難逢舊雨人  
君似伏波當益壯  
我幾南斗不能神  
合并未幾匆匆去  
魚鳥蒹葭誰與隣

大水後得雪

便涓飛洒又何佳  
得得來尋貧士家  
破屋青燈纔一黍  
荒園老樹忽千花  
酒逢寒夜饒偏貴  
詩出窮人矯轉誇  
兩月兒書渾未到  
定應行脚更天涯

蕭條籬落勝於邨  
還徑人稀早閉門  
過眼風花繞一瞥  
到頭石笋只雙蹲  
何妨歲惡詩仍好  
那笑爐空火自存  
笑詠車斜徵雪事  
諸君本本又元元

再和

饑年得雪意殊佳  
天亦終憐田父家  
是處連雲畦宿麥  
一時積水散空花  
預占餅餌真堪喜  
若比瓊瑤未足誇  
我正坐須來歲麪  
夜中踏甕喜無涯

正思覓食遠諸邨  
咄咄今朝雪塞門  
屋角空囤饑雀噪

牀頭敗絮凍鴟蹲分無醺醪能相熟賴有符貲僅自存  
堪笑少陵窮不死區區苦欲問黎元

三用韻

雪中饒有百般佳却似綢繆困約家老病自應餘菜  
色風騷猶未合梅花背暄擬向田翁覓面少時聞兒女  
誇可是年來四不出也隨簦簪傍南涯

慚愧長髯市人邨送詩踏凍到衡門未愁顧兔千毫禿  
持看陽烏三足蹲我亦欲尋安道去人應共怪阿先存

界天雪嶺依然白更憶當年李仲元

四用韻

寄食於人苦未佳從來逆旅便為家  
四時長是餅無粟  
一夜偶然燈有花  
雪夜又寒誰復料  
物中惟老不堪誇  
卷書危坐時相望  
不覺西南各一涯

五十年前三尺雪  
匆匆換枕下荆門  
坐驚荏苒興楓換  
長憶輪囷蜀芋蹲  
覆局還如一日事  
劫灰能有幾人存  
新詩讀罷令人感  
轉瞬看看又歲元



道士號庭梅為賦此

苦把庭梅劣野梅庭梅元自野梅來肯辭台鼎當年貴  
直向丹田內景開山意濃時還耐看道根孤處更深培  
玄機參透何分別猛拊闌干一笑回

送張剛甫廣德學正

桐川咫尺路平寬華檄春風白髮歡教育兼全三者樂  
起居頻報四時安謂實齋傳何況自諸老遠業宣徒

榮一官從此江東有新句寄來應對暮雲看

十一月朔冬至

魯僖再閏孰為偏五載之終似遠然辛亥徒為章首歲

上元直在太初年

是年上元甲子朔旦始正周正泰正

未從元凱叩長厯

且效少陵吟短篇一線閒愁隨日長形容空老此江邊

餞余好問入燕

炎敵漸已轉涼颼想見湖亭送別時發仞功名初得意  
聯鑣賓主總能詩昔人猶自薦佳客今日何憂乏已知  
最是人生急三釜高堂白髮數歸期

和徐容齋正旦

想見新年試筆時  
風流應不減丘遲  
歸來燕子元相識  
落盡桃花若未知  
何事蘭亭修禊樂  
便懷墨客感秋悲  
湖山勝踐無由共  
禪榻茶煙老鬢絲

和趙景程提舉見招

高標照我髮星星  
星石尺樓邊一寸莖  
樽自不空如北海  
客非善飲類公榮  
四筵驚起聞豪唱  
五斗拚教解宿醒  
何事詩筒來較晚  
且容湯粥煮榆羹

再用前韻蓋座上有九老繡幃

蒼英圖障爛如星勝似屏風映紫莖洛社便如同此樂  
商顏未必采其榮戴花劉九徒歌舞當局溫公豈醉醒  
試問諸賢閒得否熙豐一鼎沸於羹

次本齋韻

七十八春華髮老幹旋文鼎力猶堪品題人物多成傳  
管領溪山盡屬銜了不安排方是適本無全缺又何慚  
誇傳折國睢陽冠五字新詩落枕函

十月能靜飲于海棠花下唐同知適至因言昔  
在漢中十月海棠亦開用韻

貳車曾上漢中臺十月海棠無數開萬里相逢曾識面  
雙眸埽淨更傳杯高情共惜燕支暈歸夢還思灩澦堆  
客去主人應卜夜不妨喚取燭籠來

和除日聞鵲

門前車馬氣如雲鵲噪驚猜意甚馴別歲風光從草草  
報人消息喜頻頻當家金印君先得明日椒盤我自親

共樂高堂稱筭壽安輿迎養趣垂齡


送鄧善之

尺一俄聞有急徵風雲奮迅在南溟正如蜀客懷鉛筆  
未羨鴻都寫石經此事惟須一艮卦今朝頓見兩文星  
憤溝婁畔藏書去人在金坡白玉局

送人赴宜興教授

催喚沙棠港口船門前龍象聳初筵養親始願家良近  
事道中年志愈堅美俗一新吾禮樂高賢多羨此山川

不妨且為坡翁住却上玉堂陪衆仙



陵陽集卷四